



**Quæstionum Canonicarum, In Quinque Libros
Decretalium, Tomus ...**

In Librum I. Decretalium, Per quadraginta, & tres Titulos distributum, in
quo agitur De Constitutionibus, Seu Legibus universim ...

Krimer, Ferdinand

Augustæ Vindelicorum, 1706

Articulus VII. An humanæ leges obligent in conscientia?

[urn:nbn:de:hbz:466:1-73031](#)

^{231.} non necessariò consequentibus declaratiōne veritatis, de illis discurrendum secundūm doctrinā traditam à n. 211. nimis rūm ea nō depēndere ex natura rei ab acceptatione populi, sed solum ex voluntate legislatoris, ubi est rationabilis, urgens, & gravis causa in contrarium, cuius ratio ibidem data est. de his vero, quæ necessariò consequuntur censet Cardenās cit. *dissert. 1. n. 235.* peccari, non acceptandō illa, in quantum prohibitoria sunt.

Rationem dat, quia supposita declaratiōne Romanæ Cathedræ, formaliter, vel virtualiter docentis ea objecta esse illicita, eo ipso manent prohibita: ergo cūm necessariò acceptari debeat declaratio ex n. priori; eō ipso debet necessariò acceptari prohibitio. Idem dicendum, air, de illis decretis, quod attinet ad prohibitionem *docendi*, & *propugnandi* propositiones damnatas; quia jure naturæ prohibitum est, *docere tanquam licita ea, quæ sunt certò illicita*. Sed ex hoc solum sequitur, quod supposita declaratione Romanæ Cathedræ, objecta illa maneant prohibita jure naturali, & divino, non autem Ecclesiastico: Nam ea declaratio non affert Pontifici necessitatem ea specialiter etiam *jure humano* prohibendi, quia jure naturali, & divino vetita sunt.

^{232.} Quoad alteram partem de his decretis, *in quantum penalis sunt*, omnino dicendum, valde probabile esse; leges Ecclesiasticas *in quantum penales*, ubi populus ex rationabili, gravi, & urgente necessitate resistit, ex benigna legislatoris mente non obligare, nisi deducantur etiam *secundūm quod penales sunt*, in usum; non autem ubi ejusmodi causa deficit. Ratio est ex dictis. Cardenās tamen cit. licet hoc idem n. 238. probabile censeat, n. 240. absolutè negat, posse non acceptari hæc decreta, etiam quia penalia, *in quantum scilicet sub excommunicatione prohibent*; *doceri doctrinam reprobata m Cathedra Romana*; rationem dat, quia nulla est causa rationabilis ad excludendam eam pœnam; *sed hoc ultrà non probat*; & vix convincenter ostendi potest.

ARTICULUS VII.

^{233.} *An humanæ leges obligent in conscientia?*

Non defuerunt, qui dicent, legem humanam non inducere debitum

Tom. I.

naturale, seu obligationem conscientie, nisi quatenus declarat legem divinam; itē Gerson, & Almainus apud Castropal. p. 1. tr. 3. D. 1. p. 14. n. 1. sed contrarium certum est; imò multi esse de fide docent, ut ostendit, & tenet Cardenās in *Crisp. 2. D. 22. n. 13.* de quo ambo fusè agunt; & colligi poterit ex dicendis *in seqq.* Loquuntur autem omnes *de lege justa*; per quam legitimus Superior obligare intendat etiam naturaliter; seu in conscientia; his præmissis, sit

§. I.

An quelibet lex inducat obligationem conscientiae?

VIdetur dicendum negative; cūm plurimæ sint leges *pure penales*, aut solum *permisive*, quin obligent in conscientia; sic jure gentium permittitur, homines justo bello captos in servitutem redigere; contra injustè occupantem terras alienas bellum movere; legitimè soluto primō matrimonio inire secundas nuptias &c. Econtra Castropal. cit. cum D. Thoma 1. 2. q. 92. a. 2. ad 1. & q. 93. a. 2. tenet, nullam esse legem *veram*, *justam*, & *rationabilem*, quæ vim obligandi non habeat; quia juris naturalis est; debere parere legitimo superiori, quando ex potestate, sibi, ut superior est, competente, constituit legem veram, justam, rationabilem cum intentione obligandi; & hoc omnino probabilius dicitur, nec obstant, quæ in contrarium instantiæ afferuntur. Nam, ut iam notavimus suprà de ratione legis non est; nisi ut aliquos, seu communitatem aliquam liget, eam nempe, quam legislator gravatam vult; boni communis intuitu, ut aliquam actionem præstet, vel omittat; esto eum, in cuius favorem ea lex, alios obligans non stringat, ut manifestum est in multis, utroque jure. Ex his ad particularia descendendo

Not. 1. legem, quia conceditur; quod in bello justo capti possint in servitutem redigi, non esse legem veram *relatè ad capti- entem* (sic enim est meræ facultatis, & concessionis) sed *relatè ad sic captos*; & alios; qui prohibentur, ne justum ejusmodi bellatorem in usu stii juris, & facultatis impediunt. Sic Respondetur ad omnes causas;

H

quiibus

quibus alicuius privilegium , aut facultas aliqua juris dispositione conceditur. Ex hoc sequitur , per dispositionem aliquid permittentem v. g. (ut evitentur majora mala) catenus legem esse , quatenus gravat , ac obligat alios permittenti subditos , ne permissione utentem perturbent , de quo plura dicam de lege permittente à n. 308. id , quod etiam intelligendum venit de privilegij concessione.

236. Not. 2. leges etiam merè penales , esse veras leges. Per has enim inducitur obligatio primum in judices , ut ubi boni communis ratio postulat , legum transgressores puniant ; deinde in subditos , ne justæ pénarum impositioni , & executioni resistent. Ad hoc autē sufficit culpa politica , seu civilis ; quo salvatur , quâ ratione leges certarum Religionum , quæ in conscientia non obligant ad actuūimmediate præscriptū um; sed tantum ad subeundam pénā supposita transgressione , leges sint. Quando autem consilium in l. Legis virtus ff. de legibus . numeratur inter leges ; eo loco nomen legis sumi latè , pro qualibet regula , operantem , ratione suaviva boni decentis dirigente. Cæterum consilium à lege , proprie dicta omnino distingui , diximus à n. 90.

237. Not. 3. Ex eo textu ad Timoth. 1. *justo non est lex posita* ; & ad Galat. 5. *si spiritu ducimini , non estis sub lege*: non deduci , nullam humanam legem obligare posse , nisi quatenus declarat legem divinam. Nam eorum verborum sensus aliis non est , quâ justos charitate , & spiritu Dei operari bonum; non autem , timore poenæ ; adeoque esto nulla lege alia ducerentur ; juxta illud: *oderunt peccare boni virtutis amore*. Cæterum , cum lex non tantum sit , ut metu culpæ , aut poenæ coercent hominum voluntates à malo , sed etiam (ut diximus in tract. de Incarnat.) ut præbeat materiam virtutis , & laudabilis meriti , dum voluntate legitimi superioris se conformant , etiam justo , & his , qui Spiritu Dei aguntur , meritò lex posita est.

238. Not. 4. Cùm dicitur , peccatum esse di-ctum , factum , vel concupitum contra legem Dei ; non excludi legem humanam ; cùm etiam transgressio constitutionis humanæ consequenter redundet contra legem Dei. Nam , ut rectè dicitur Lucæ 10. *qui vos spernit* (nimirum legitimos suos præpositos)

me spernit. Et ideo rectius dicitur , quod Princeps etiam secularis (et si quod electus sit , habeat à populo , vel subditis) potestatem regendi subditos , electione supposita , immediatè habeat à Deo. Nam per me Reges regnant , & conditores legum justa decernunt , ait Dominus Proverb. 8. & Sap. 6. Audite Reges , quoniam data est à Domino potestas vobis. Hinc Paulus ad Rom. 13. *omnis anima potestatis sublimioribus subdita est* ; & quidem ita , ut , si quis tali potestati resistat , Dei ordinationi resistat. Hinc omnino dicendum est , cùm legitimus superior legem constituit , quâ velet ejus transgressionem , legi oppositam , esse prohibitam , eo ipso peccare violatione legis ; sic enim resistitur divinae ordinationi , ut dictum est.

239. Et quoniam ex lege aeterna Dei tene-
mur obedire mandato hominis , in quantum præcipientis , vel prohibentis aliquid ex vi potestatis à Deo data , & positâ tali lege humanâ , inobservantia hujus , ab illa aeterna lege graviter prohibita est , etiam cum iactura aeternæ salutis , rectè colligi-
tur , quod homo possit præcipere aliquid , vel prohibere aliquid , non directè sub pena damnationis ; sed indirectè tantum , quatenus ponit sub legi sua actum , vel omissionem debitam , quâ culpabiliter non posita , transgressor , vi legis aeternæ , reus fiat illius pœnae. Unde licet homo non cognoscat ea , quæ geruntur in alterius conscientia ; nihilominus ab illo potest alius obligari in conscientia ad positionem , vel omissionem actus externi , cùm talis obligatio non tendat ad ea , quæ in conscientia fiunt , sed ad ea , quæ externè . Nam ut externè fiat , quod præcipitur , plurimum præsertim apud ingenuos , & honesti studiosos potest metus culpæ contra Deum , vel componendi omissione actus debiti cum lege ; cùm hoc sit dissolum rectæ rationi.

240. Ex hoc habetur , eo ipso , quod scien-
ter quis laedit legem humanam , laedi eti-
am legem divinam. Nam humanus le-
gislator regit potestate acceptâ à Deo , ut
diximus ; hinc , cùm ipse legem imponit ,
Deus obligat , ut illa servetur ; & pœnam aeternam illis constituit , qui contra eam
graviter agunt. Et ideo non faciendō ,
quod lex humana præcipit , Dei legem vi-
olat de parendo justæ legi constitutæ ab
eo , qui ad hoc potestatem à Deo habet ,
non

non violaturus cæteroquin hanc æternam legem Dei, nisi violaretur lex humana.

§. II.

An lex iusta ex parte rei præceptæ inducat obligationem conscientiæ?

241. **T**riplici de causa lex potest esse *iusta*: 1. ex parte rei præceptæ, cùm præcipit, quod contrarium est bonis moribus, vel bono communi; 2. ex parte præcipientis, cùm in eo deficit potestas ferendi talēm legem; 3. ex parte subditorum, quando deficit fundamentum, & ratio, propter quam lex illis imponitur; quo posito: Resp. legem *iustam* ex parte rei præceptæ, quæ scilicet contraria est iuri naturali, & divino, nullam inducere obligationem conscientiæ. Ratio est, quia hoc ipso non est lex; cùm de ratione legis sit, quod justa sit secundum ordinem rectæ rationis, ut dictum est n. 84. alioquin daretur obligatio ad peccatum formaliter. Idem dicendum venit, quando res præcepta adversatur bono communis, cuius utilitas, & commodum, directè intendi debet à lege, ad hoc, ut lex sit, juxta n. 91. Nam in hoc bono directè querendo fundatur potestas legislativa, in quantum pollet virtute inducendi obligationem conscientiæ, nimis in ædificationem, non in destructionem, & ruinam Reipublicæ, cuius illi regimen à Deo commissum est.

242. Ex hoc colliges, quando constat per legem conditam, seu potius iussionem ejus, qui alijs præpositus est ad illius Reipublicæ conservationem, principaliter, & directè queri bonum privatum, cum onere, & detimento communitatis, nullam induci obligationem conscientiæ in subditos; sic enim ea iussio, seu lex, non foret lex; quia non foret *iusta* ex parte rei præceptæ; tametsi alias ea res præcepta, etiam à subditis executioni data, non esset peccatum. Idem à fortiori sequitur, quando res præcepta directè tendit ad id, quod bono communis positivè nocivum est; quod frequenter fit, ubi Præpositi locorum condunt leges directè faventes utilitati Potentiorum, amicorum, consanguineorum, vicissim obsequia præstitorum &c. magno populi, & majoris partis subditorum detrimento; qualiter sit editis publicis excludingendo exteris à vendendis mercibus

leviori pretiō, ut illi pauci suas distrahanter graviori, & lucrō suō; egenis tantō pretiō destitutis &c.

§. III.

An lex iusta ex parte præcipientis inducat obligationem conscientiæ?

243. **R**esp. negativè; quia lex humana, in quantum inductiva obligationis conscientiæ, debet procedere à Superiore, quâ tali, hoc est, munito potestate legislativa in tali materia, & respectu talium personarum; ergo dispositio, quæ non procedit à Superiore, quâ tali, non est lex; ergo, ubi talis dispositivo est iusta ex parte præcipientis, non inducit obligationem conscientiæ: excipi tamen, nisi in certis casibus, amore boni communis, hanc potestatem suppletis, à quo id pendet; qualiter interdum contingit, cùm quis occulto laborat impedimento, propter quod est incapax munieris, & officij, quod gerit, dependenter à quo cæteroquin habenti tale munus legitimè, talis potestas jure competit, de quo agitur in *l. Barbarius ff. de offic. Prætor.*

Ex hoc defectu multæ hominum dispositiones, quas tanquam leges observari volunt, iusta, consequenter nullæ sunt, & omni virtute carent in conscientia ligandi eos, in quos feruntur. Cujus ratio est, quia nulla *jurisdic̄tio extendere se potest ultra limites*, ut dicitur *l. ult. ff. de jurisdic̄t. omn. jud.* Cum enim statutum sumat vires à potestate statuentium, per c. à nobis *l. de sent. excommunicat.* ubi in disponente, vel statuente non est potestas disponendi, vel statuendi aliquid de tali re, vel in talem personam, dispositio, vel statutum, viribus caret.

244. Et ideo leges sæculares, quæ generatim latæ sunt, per se, & ex objecto imponentes onus, seu gravamen, aut derogantes juri acquisito, ad personas, & res Ecclesiasticas se non extendunt; ita Bartolus in *l. cunctos populos q. 5. n. 28. C. de SS. Trinitate* Andreas Gaill. *l. 2. observat. 32. Imola in c. 1. de Summa Trinit. Sylvester V. lex q. 15. Suarez l. de Eccles. immunitate c. 22.* & alij communiter. Nam quatenus extendunt se ad personas, & res Ecclesiasticas, iusta sunt ex parte præcipientis; nimis defectu potestatis ferendi leges, quibus ligantur

gentur personæ, ac res Ecclesiasticæ, ut potest divino pariter, ac humano jure à potestate laicorum exemptæ, ac liberae, ut dicitur c. quanquam, de censib. in 6. Nam sicut res sacræ à profanis, spiritualia à temporalibus discreta sunt, ita & potestas Ecclesiastica, ac profana, seu secularis sunt diversæ, ac discretæ, c. duo sunt, dist. 96. & quidem ea ratione, ut sicut corpus animæ, temporalia æternis, & profana spiritualibus, sic potestas laica, seu politica potestati Ecclesiasticæ cedere, ac subordinata esse debeat, in his, quæ tam profanas, quam res Ecclesiasticas concernunt, ut dicitur cit. c. duo sunt dist. 96. c. solite 6. de majoritat. c. fin. de reb. Eccles. non alienand. sed de hoc infra à n. 616.

Q. IV.

An lex injusta ex parte subditorum inducat obligationem conscientie?

246. Questio est, si ex parte subditorum non subsit, vel cesset fundamentum, & ratio, propter quam illis lex imposta est, nihilominus inducatur, aut maneat obligatio conscientiae in subditis ad parendum ei legi? ante resolutionem not. 1. legem eo ipso, quod lex sit, debere fundari in aliqua ratione, quæ legislatori suadeat, boni communis felicem, & tranquillum statum exigere, ut hic & nunc lex aliqua constitutatur, præcipiens aliquid faciendum, vel omittendum. Not. 2. in hoc casu frequenter evenire, quod legislatorem ad condendam legem inducat præsumptione juris de aliquo facto, aut delicto particulari, vel saltem de probabili periculo, seu casu communiter contingente. In primo casu dicitur lex fundata in præsumptione facti, seu casus particularis; in secundo, in præsumptione moralis periculi: seu casus in talibus circumstantijs communiter evenientis; his præmissis:

247. Resp. 1. quando lex fundatur in præsumptione facti particularis, ubi constat de falsitate facti, nullam esse obligationem legis. Nam ubi veritas præsumptioni non convenit, cessat, & abest in legislatore animus obligandi, sine quo non stat lex; cum enim ea voluntas inducens obligationem innitatur suppositioni talis facti, tanquam fini adæquato, consequenter, si non formaliter, saltem æquivalenter sit

conditionata; conditione, & fine adæquato deficiente, nihil ponit in esse; ita Suarez l. 3. de legib. c. 23. n. 9. & l. 5. c. 24. Vnsq. i. 2. D. 163. a. c. 2. Sayrus in Clavi reg. l. 3. c. 7. n. 8. Salas de legib. D. 10. f. 4. & D. 16. f. 14. &c. Unde etiamsi tali casu superior falsitatem facti, consequenter præsumptionis ignorans, urgeat obseruantiam legis fundatae in præsumptione juris de facto, vel delicto aliquo particulari (quia tamen præsumptioni non sufficit veritas) subditus ab ejus obligatione immunis est; quia tali casu non est lex in veritate, sed solum in falsa præsumptione; Sic Castropal. p. 1. tr. 3. D. 1. p. 14. n. 12. Aliud est, quod superior imponens legem ex præsumptione facti, non cognoscens, hanc esse falsam, justè procedat quoad se, & suam conscientiam; aliud, quod justè procedat quoad rem: aliud, quod sufficiat propterea primum ad hoc, ut lege teneatur subditus; ad hoc enim requiritur secundum; quia secus in legislatore voluntas obligandi non est efficax ex dictis.

Tametsi autem præsumptio facti, etiam probati secundum allegata, sed falso, sit occasio ferendi legem, seu præceptum; non tamen ipsa, sed factum est ratio finalis præcipiendi; consequenter, esto illa stet, etiam cum constat de falsitate cause finalis, non tamen stat lex, quæ unicè innititur huic, non illi. Sic si quis à te petat solutionem debiti, & hoc coram Judice per falsos testes probet judice solutionem præcipiente, si tamen tibi constet probatio nū, consequenter præsumptionis de existente debito falsitas, nō teneris in conscientia; nam animus obligandi fundatur in causa finali, quæ est veri debiti solutio, quâ veritate sublatâ lex vera non est; quod confirmatur: nam si quis cum impedimento dirimenter re ipsa existente, sed inculpabiliter ignorato, contraxit, ac dein certam notitiam impedimenti, consequenter nullitatis matrimonij acquirat, non potest uti matrimonio, nec tunc quidem, quando judex etiam sub poena excommunicationis præcipit, ut uxori cohabiter, præcepto fundato in præsumptione falsa de nullitate impedimenti per probationes in re falsas allegata, ut habetur c. tua nos, 26. de sponsal. ubi proposito casu promissi matrimonij, securâ etiam copulâ inter spons-

sponsos (unde in foro externo jure antiquo præsumebatur matrimonium) præsumptio cognitâ veritate rejicienda diciur; nam cum quandam mulierem quidam aliter inducere nequivisset, ut sibi commisceretur carnaliter, nisi desponsasset eandem: nullâ solennitate adhibita, vel alicuius præsentia dixit illi: *Te Joannes desponsat*: cum ipse Joannes non vocaretur, sed fixit se vocari Joannem: non credens esse conjugium, eo, quod ipse non vocaretur hoc nomine, nec haberet propositum contrahendi, sed copulam tantum exequandi carnalem; Pontifici propositum fuit, utrum inter prædictos sit matrimonium celebratum: cum mulier consenserit in eundem, & ille dissenserit, & dissentiat, nec aliud quicquam egerit, quam superius est expressum, nisi quod cognovit eandem: ad quod respondit Pontifex: quod, cum præfatus vir prædictam desponsaverit mulierem in propria persona, & sub nomine alieno, quo vocari tunc se fixit, & inter eos sit carnalis copula subsecuta: videtur forte pro conjugio præsumendum, nisi tu nobis expreſſe ſcripſiſſes, quod ille non proposuit, nec conſenſit illam ducere in uxorem, quod qualiter tibi conſtiterit, non videmus. Nos autem, quod juris ſit reſribentes, dicemus, quod ſi res ita ſe habet, videlicet, quod ille eam non proposuit ducere in uxorem, nec unquam conſenſit in prædictam personam, non debet ex illo facto conjugium judicari, cum in eo nec ſubſtantia conjugalis contraſtūs, nec forma contrahendi conjugium valeat inveniri: quoniam ex altera parte dolus ſolummodo adſuit, & defuit omnino conſensus, ſine quo cetera nequeunt fædus perficere conjugale.

249. Idem colligitur ex c. *Inquisitioni* 44. de *sent. excommunicat*. ubi Pontifex rogatus, an, quando aliquis per allegata, & probata, per Ecclesiam compellitur alteri conjugaliter convivere, id præſtare poſſit, ſi certο ſciat, matrimonium eſſe nullum? reſpondit Pontifex: in quaſtione facta eſt diſtinguendum, utrum alter conjugum pro certo ſciat impedimentum conjugij, propter quod ſine mortali peccato non valet carnale commercium exercere, quamvis illud apud Ecclesiam probare non poſſit: an non ſciat pro certo, ſed credit? in primo caſu debet potius excommunicationis

ſententiam humiliter ſuſtinere, quam per carnale commercium peccatum operari mortale: in ſecundo diſtinguiuſ, utrum habeat conſcientiam hujusmodi ex credulitate levi, & temeraria, an probabili, & diſcreta, & quidem ad ſui Pastoris conſilium (conſcientia levi, & temerariae credulitatis exploſa) licet poſteſt non ſolum reddere, ſed exigere debitum conjugale. Verum cum conſcientia pulſat animū ex credulitate probabili, & diſcreta, quamvis non evidenti, & maniſta: debitum quidem reddere poſteſt, ſed poſtulare non debet: ne in alteratō, vel contra legem conjugij, vel contra iudicium conſcientiae committat offenſam, ubi patet non fuſſe locum præſumptioni, cuius alia ratio non eſt, quam quia non ſubeft præſumptioni veritas. Hinc licet in Rubrica c. *Tua nos* 26. de *sponsal*. expreſſe dicatur, quodſi alter contraſtentium utatur verbis dubijs, animō decipiendi mulierem, & eam poſtmodum cognoscat carnaliter, ubi ſolum adeſt præſumptionio affectus conjugalis; iudicandum ſit pro matrimonio in foro judiciali: ſēcūs in pænitentiali, ubi contra præſumptionem conſtat veritas. Unde liet in c. *Is*, qui, 3. eod. dicatur, ſponsalia de futuro tranſire in matrimonium, per carnalem copulam subſecutam, ita ut, quamvis hoc videatur matrimonium tantum præſumptum, tamen contra præſumptionem hujusmodi non ſit probatio admittenda; intelligitur tamen ſolum pro foro fori: non poli; immo etiam pro foro fori, ſi conſtaret de veritate, conſequenter præſumptionis falſitatem, ut colligitur etiam ex c. *Inquisitionis* 44. de *sent. excom*.

— Resp. 2. quando lex, ſeu præceptū fundatur in præſumptione probabili periculi, non ceſſare talēm legem, ſeu præceptū, eſto ceſſet, ſeu abſit periculum in aliquo caſu ſpeciali; ita Suarez, Salas, & alij ſupr. cit. Quia per hoc, quod ceſſet in caſu aliquo particuliari, non deficit veritas præſumptionis, quod ex natura rei generaliter, ſeu communiter ſic contingat, ſeu, quod illud agere, communiter periculofum ſit. Sic lex, quæ annullat diſpositionem pupilli, factam ſine authoritate Tutoris, ſtat, etiamſi in caſu aliquo particuliari contingat, eum habere ſufficientem maturitatem, quæ requiritur ad validē contraſendum; quia hoc non obſtante generaliter verum manet

manet, in ea ætate communiter non adesse sufficientiam illius judicij, citra periculum passivæ fraudis. Idem est de professo ante 16. xatis annum.

251. Tota difficultas est in applicatione utriusque regulæ ad casum particularem, in quo queritur, an hic, & nunc legi, quæ allegatur, locus sit? Nam et si sciam *locum esse legi*, etiamsi in casu particulari absit periculum, si *lex lata est ex presumptione periculi communiter conjuncti, & non esse locum legi*, quando fundatur in *presumptione particularis facti*, ubi constat de veritate oppositi: quæstio tamen manet, unde cognoscere valeamus, quod hæc, vel illa lex fundetur in *presumptione facti particularis*, vel *periculi generalis*?

252. Castropalaus cit. p. 1. tr. 3. D. 1. p. 14. n. 13. resolvit quæstionem allatis exemplis, docens legem, seu juris dispositionem, quæ irritat contractus Minoris, & pupilli sine autoritate Tutoris, & alijs conditionibus requisitis, donationem vxoris factam marito, obligationem dotis, renuntiationem illius, aut legitimæ, confirmationem testamenti, vel electionem sine solennitate, fundari in *presumptione generalis periculi ex natura rei regulariter intervenientis fraudis*, ubi ejusmodi præscriptæ solennitates non adhibentur: econtra dispositionem juris, legem, vel præceptū aliquid statuens propter aliquod particulare factum, vel omissionem, præsertim imponens pœnam, vel positivam, vel privativam illi, de quo jus tale factum præsumit, consequenter pœnalter disponit, communiter faltem fundari, in *presumptione particularis facti*; sic quando *Judex per sententiam in judicio præcipit restitutionem*, vel *solutionem faciendam à Titio*, quia secundum allegata, & probata *Titius detinet alienum*, vel *contraxit debitum*, præceptum procedit ex *presumptione facti*, debiti scilicet reipsa contracti, vel actualis detentionis rei alienæ; quo casu is, cui tale præceptum pœnale imponit, nullam in conscientia obligationem habet parendi, si certus sit de falsitate *presumptionis*, consequenter præcepti, seu legis illi innixa, ut dictum est n. 247.

¶(o)¶

§. V.

An lex pœnalis obliget in conscientia ad actum immediatè intentum?

C_Asus est, Superior Ecclesiasticus, vel sacerdotalis præcipit positionem, vel omissionem alicujus actus, & transgressoribus statuit pœnam, vel ipso facto incurriendam, vel faltem facta, seu sententia judicis infligendam. In tali casu dubitari potest, an subditus in conscientia teneatur ponere actum immediatè præceptum v. g. *solutionem debiti*, præstandam sub pœna 100. aureorum, vel sub pœna depositionis verbalis, ita, ut omisssâ solutione verè peccet; vel solùm facta solutionis omissione contrahat *debitum subeundi pœnam*, non contra facta culpâ conscientiæ, propter omisssam solutionem?

Ante resolut. not. hoc totum pendere ab intentione legislatoris, an voluerit subditum obligare in conscientia, & ad actum immediatè intentum à lege, & ad pœnam in casu transgressionis; vel solùm ad pœnam? certum enim est, quod, ubi necessarium judicaverit, ut obliget ad utrumque, id justè possit; & si per solam obligacionem ad pœnam, finem à se intentum sufficierter obtineri posse, visum fuerit, justè obliget ad solam pœnam. Hinc tota quæstio est, unde in dubio colligendum sit, quod lex canonica, vel civilis lata sit intentione obligandi subditum in conscientia ad utrumque, an solùm ad pœnam? pro quo Not. 2. pœnas alias esse *spirituales*, ut sunt excommunicatio, suspensio, interdictum irregularitas in vindictam delicti, depositio, degradatio, privatio Ecclesiastice sepulturæ &c. quasdam merè *temporales*, cuiusmodi sunt pœna pecuniariae, confiscatio bonorum, carceratio, exilium, infamia, mutilatio, mors &c.

Not. 3. quasdam pœnas esse, quæ supponunt necessariò *culpā Theologicā*, seu conscientiæ, hoc est peccatum contra Deum, imputabile delinquenti, & punito, vel puniendo, causâ delicti. Tales pœnae sunt omnes censuræ, & plurimæ alia pœnae Ecclesiastice, quæ infligi non possunt, nisi Reo peccati. Etsi autem pleraque pœnae Ecclesiastice supponant peccatum grave, id tamen non procedit universaliter; faltit enim in excommunicatione minori,

& in

& in suspensione non totali; v. g. solum ad unum actum, & protina vice &c. distinguendum etiam est inter paenam, quae supponunt peccatum grave, an sint late sententiae, nimurum, ut incurvantur ipso jure; vel etiam ferenda, nimurum post sententiam Judicis, quibus positis:

256. Resp. 1. ex hoc, quod delicto imposita sit pena spiritualis, bene colligi, praecipsum, vel legem paenalem obligare ad utrumque nimurum, & ad actum immediate intentum à lege, & ad paenam. Nam omnes paenae spirituales, per legem constitutae transgressoribus, supponunt culpam Theologicam, seu conscientiae, commissam contra legem, quae talem paenam statuit ipso jure; ergo necesse est, quod lex obliget in conscientia ad positionem actus immediate intenti, si positiva sit; vel ad omissionem ejus, si sit negativa, ut tenet communis cum Suarez l. 4. de legib. c. 18. Sanch. l. 6. c. 4. n. 49. Bonac. D. 1. q. 1. p. 7. §. 4. n. 49. Salas de legibus D. 10. f. 9. ex quo sequitur leges Ecclesiasticae, quae transgressoribus imponunt paenam spiritualem, nec esse mere preceptivas, quae obligent ad solum actum immediate intentum à peccato, absque pena; nec mere paenales, quae obligent ad solum paenam, quin obligent ad actum immediate intentum sub peccato: sed esse mixtas, nimurum in conscientia obligantes, & ad actum immediate intentum, & ad paenam, supposita transgressione legis.

257. Resp. 2. quando lex sive canonica, sive civilis transgressoribus statuit paenam solum temporalem, non æquè convenire Doctores. Nam aliqui docent, tali casu legem esse mere paenalem, quoties pena solum est temporalis, nec aliud legislator exprimit. Hanc sententiam latè probat Navarrus in summa c. 23. à n. 55. & l. 1. consiliorum, consil. 3. Eandem tenet Valentia in 1. 2. D. 2. q. 5. tanquam probabilem, cum Diana p. 1. t. 10. resol. 20. Mathæo de Moya in questionibus selectis Theol. moral. tr. 6. D. 4. n. 22. qui pro eadem, tanquam probabili, plurimos alios refert ibid. Idem sentit Castropalaus P. 1. tr. 3. D. 1. p. 15. n. 12. Nam ad rectam gubernationem necesse non est, sub culpa mortali præcipere; cum sufficiat culpa politica, vel civilis. Et ideo etiam Escobar Theol. mor. tom. 1. l. 5. f. 2. c. 7. probat. 26. pag.

164. quia legislator, inquit, qui ad paenam temporalem, & æternam potest obligare, si solius meminit temporalis, non videtur intendisse obligare ad æternam; immò quando paenæ spiritualis, & temporalis facit mentionem, ad solum temporalem obligare, ex sua intentione; docent non pauci. Priorem partem defendit etiam P. Henricus Herdinck cit. ut probabilem in M. S. de legib. q. 19.

Alij econtra docent, semper esse indicium gravis obligationis, etiam ad actum immediate intentum à lege, non obstante, quod imponat paenam solum temporalem, quoties ejusmodi leges eduntur in gravi materia sub verbis graviter praceptivis, nisi aliunde constaret, legislatorem velle tantum sub veniali obligare; sic de Moya cit. D. 4. q. 3. §. 5. n. 28. cum Vasquez 1. 2. D. 159. c. 2. n. 10. Thoma Sanch. in summa tom. 2. l. 6. c. 4. n. 60. Beccan. Granad. & alijs, quorum ratio est, quia, quando legislator utitur verbis graviter praceptivis in materia gravi, quin addat paenam, colligimus, quod intendat obligare in conscientia graviter; ergo etiam, cum addit paenam; hæc enim non infert defectum intentionis obligandi, sed legislatorem ardentiū intendere legis adimplitionem; ita illi; his præmissis:

Resp. dicendum ex hoc præcisè, quod commissioni, vel omissioni alicujus actus statuta sit pena mere temporalis, non rete argui, à legislatore praecipsum, vel prohibitum esse talem actum, immediate præscriptum à lege, sub obligatione conscientiae, nisi aliunde intentio legislatoris constet, vel colligatur; sic Castropalaus cit. n. 12. & apud eum Navarr. cit. c. 23. à n. 57. Reginald. l. 15. n. 50. & aliij. Nam ratio legis salvari potest in obligatione conscientiae ad paenam, supposita culpâ, etiam solum politica seu civili, per commissionem, vel omissionem actus sub temporali pena debiti; ergo, ubi ratio boni communis non exigit obligationem conscientiae pro actu per legem immediate intento; ac ejus bono debitè consiluitur metu solius paenæ; nec legislator exprimit animum obligandi in conscientia, etiam in actu immediate ordinato per legem, non est, unde colligamus voluntatem, ac intentionem ejus imponendi obligationem conscientiae ad utrumque. Confir. lex

lex alternativa, quæ scilicet vel formaliter vel æquivalenter petit, vel positionē aliqui-
jus certi actus, vel solutionem pœnae, si o-
mittitur actus, non obligat determinatè ad
actus; sed leges, quæ imponunt pœnam
merè temporalem transgressoribus, saltem
æquivalenter sunt hōc modō alternativæ;
ergo non obligant determinatè ad positio-
nē talis actus: min. prob. 1. ab exemplo ali-
arum legum, quæ petunt vel non fieri actū,
vel petere licentiam faciendi actū, sic
ut si neutrum fiat à subdito, sit reus culpæ;
2. omnis conditionata, saltem æquivalen-
ter, est alternativa; sic lex, quæ, si quis lu-
serit aleā sine licentia superioris, statuit
multam 10. aureorum, conditionalis est,
& pœnam exigit, si quis luserit sine licen-
tia; resolviturque, seu æquivalet huic: *vel*
non inde sine licentia; *vel, solve multam;*
quæ alternativa est; sed sī se habent ejus-
modi leges imponentes transgressorib⁹ pœ-
nam temporalem, nisi aliud exprimat le-
gislator, quod velit utrumque; contra il-
lum enim, qui potuit aliter dicere, & non
dixit, interpretatio justa fit; ergo.

260. Dixi: non rectè colligi animum *obli-
gandi in conscientia ad actum immediatè
ordinatum a lege, ex hoc præcisè, quod
transgressioni statuatur pœna temporalis,
etiam gravis.* Nam in hoc conveniunt
cum hac opinione non tantum authores
primæ sententiæ in n. 258. licet contrari-
rium sentiant Suarez, Sanchez, Bonacina,
& complures alij apud Castropol. cit. n. 11.
saltem in casu pœnae mortis &c. verum ra-
tio couclusionis (n. 259.) valet etiam in
hoc casu.

261. Dices tamen 1. cum his; illæ graves pœ-
nae temporales debent esse justæ; hoc autē
non fieret, si non supponerent culpam gra-
vem in commissione, vel omissione actus
immediatè à lege ordinati, vel præscripti. sed

Resp. dist. maj. nisi supponerent culpam,
vel Theologicam, vel politicam, seu civile,
quæ scilicet consistit in deordinatione
perfectionis debitæ, secundum ordinem a-
licujus Reipublicæ, quam importat com-
missio, vel omission libera conc. simpliciter
Theologicam neg. cùm enim Legislator, si
vellet, posset non obligare sub culpa Theo-
logicæ per talen legem, ut dictum est; non
necessariò supponit culpam Theologicam
ea pœna apposita; sic distinctè minore neg.
conseq.

Confirmari potest exemplo communi- 262.
ter recepto, quod affert Castropol. cit. n.
12. Nam custodibus mūtorum in bello
lex imponi potest de vigilia in bello, sub
pœna vitæ, quin ex vi hujus legis ad custo-
diā graviter obligentur in conscientia.
Unde Navarr. cit. nihil speciale, inquit, re-
peritur *in pœna mortis, & mutilationis, ra-*
*tione cuius culpam mortalem debeat ne-
cessariò supponere.* Hinc aliud est, talem;
qui committit, vel omittit actum sub pœna
mortis prohibitum, & sic exponit se gra-
vis mali periculo, *peccare in conscientia,*
contra legem naturalem per commissiōnem,
vel omissionem talis actus; aliud, quod *con-
tra illam legem humanam, & pœnalem.*
Nam hanc obligationem ad ejusmodi actū
nec exprimunt verba legis illius humanæ,
nec arguit impositio pœnae.

Ratio hujus est ulterior. Quia, si pœna
temporalis necessariò argueret obligatio-
nem conscientiæ ad actum immediatè or-
dinatum, esset ex eo, quod temporalis pœ-
na necessariò supponat culpam conscientiæ
contra talem legem Reipubl. tanquam
aliquid necessarium ad defensionem sui ju-
ris, at hoc fallit, cùm æquè, imò frequen-
ter magis salvum stet jus Reipublicæ me-
tu solius pœnae temporalis, quam culpe
Theologicæ; cùm notum sit illud: *ode-
runt peccare mali formidine pœnae.* Dein-
de sic omnis lex pœnalis foret mixta, quod
tamen multi negant, volentes nullam pœ-
nam temporalem, nisi mortis, & mutilationis
esse indicium sufficiens, quod legislator
in conscientia voluerit obligare ad
plūs, quam solam pœnam, ut videri po-
test apud Castropol. cit. n. 11.

Dixi 2. in n. 259. *ex sola pœna tempo-
rali, etiam gravi*, non haberi sufficiens
indicium, quod lex obliget in conscientia
ad actum immediatè ordinatum à le-
ge, nisi aliunde mens legislatoris constet.
Unde quæstio est 1. an saltem eo casu sit
sufficiens indicium obligationis conscientiæ
ad utrumq.; quando legislator tititur *ver-
bis præceptivis, & simul injungit trans-
gressoribus pœnam temporalem?* quæ autem
verba sint propriæ præceptiva? dicemus
à n. 273. Responsio verior affirmat, nisi
consuetudo legitima obtineat contrarium.
Supponendum autem nos loqui de verbis
præceptivis, *immediatè directis ad ipsum
actum, directè ordinatum à lege, v. g. so-
lutio-*

lutionem vestigialium &c. Nam verba præceptiva significant, quod præcipiens intendat eum obligare, cui præcipit, ad illud præstandum, ad quod immediate dirigitur præceptum; ergo si immediate dirigitur ad ipsum actum directè ordinatum à lege, significat, quod præcipiens intendat eum obligare, cui præcipit, ad actum directè ordinatum à lege; ergo est sufficiens indicium, quod intendat obligare non ad solam poenam, sed ad hanc, & simul ad actuū immediate ordinatum à lege, quando transgressoribus imponit poenam temporalem non utcunque, sed utendō simul *verbis præceptivis immediate directis ad ipsum actum directè ordinatum à lege;* ita Sanch. l. 6. in Decalog. c. 4. n. 60. & plures alij, quos citat, & sequitur Castropal cit. p. 15. n. 8. Dixi autem, nisi consuetudo legitima obtineat contrarium; hæc enim est optima legum interpres, ut dicitur c. cum dilectus de consuetud. & L. minimēff. de legib. Confirmari potest ex eo, quia si Legislator prohibens, vel præcipiens aliquem actuū, non comminandō, vel statuendo poenam aliquam transgressoribus, rectè colligimus, ipsum actum esse sub obligatione conscientiæ, quando materia potest sub tali obligatione constitui, & Legislator utitur verbis præceptivis directè de ipso actu; sed appositio poenæ sub iisdem verbis præceptivis directè de ipso actu, non mutat verba, & eorum significationem; ergo etiam in hoc casu indicant obligacionem conscientiæ de ipso actu.

265. Pro solutione contrariorum not. 1. concedi, quod non debeant subditis imponi leges, & onera, præfertim conscientiæ, sine necessitate, sic estimata à prudenti, ac Deum timente Legislatore cui cordi sit bonum commune; quando autem talis Legislator condit legem cum pena temporali, simul & verbis præceptivis immediate directis ad ipsum actum à lege directè intentum, est sufficiens indicium, inferendi eum estimasse necessitatem obstringendi non tantum ad poenam, sed ad ipsum etiam actum legis; multos enim cohibet metus peccati contra conscientiam, quos non cohibet metus poenæ temporalis.

266. Not. 2. licet Legislator sciat probabilitatem sententiae, docentis universaliter, leges, quæ præcipiunt, vel prohibent aliquid sub pena temporali, obligare in con-

scientia solum ad poenam, & non ad actuū immediate præscriptum, nec eam probabilitatem intendat tollere; exinde tamen non sequi, subditos esse absolute, sed tantum probabiliter deobligatos, quo non fit, oppositum esse probabilius, ac verius; nec semper locum esse, cuicunque probabilitati, prout revera multi abutuntur.

Not. 3. et si verum sit, consuetudinem 267. esse optimam legis interpretem; & Na-varrus in Summa c. 23. à n. 55. & alibi, dicat, consuetudine receptum esse, quod ejusmodi leges habeantur, ut mere poenales; quia tamen alij Doctores (ut diximus n. 264.) negant hanc consuetudinem, ubi tales leges feruntur sub verbis præceptivis, ex illis nihil omnino certi, aut majoris probabilitatis concludi potest pro sententia nostræ opinioni contraria.

Not. 4. concedi, quod legislator manus non possit directè (secùs indirecte) obligare ad poenam æternam; & transmitti, quod ubi ex duobus propositis unum conceditur, & alterum tacetur, censeatur exclusum, quod tacetur, juxta c. Nonne, de presumpt. sed ex hoc tantum sequi, quod, quando legislator humanis transgressoribus legis statuit poenam temporalem absque verbis præceptivis immediate directis ad actum directè præscriptum à lege, ipsum intendere solum obligare ad poenam; non autem, si secùs.

Not. 5. cùm dicitur, antiquos legislatores, & Principes seculares, imponendo leges sub pena temporali, nihil cogitasse, aut curasse de obligatione conscientiæ: posse dupliciter responderi, & 1. contra utentes hoc argumento, inferendo. ergo nec ad poenam est obligatio conscientiæ, quod tamen non admittunt. 2. id immerito dici, quando usi sunt verbis præceptivis, immediate directis ad ipsum etiam actum directè ordinatum à lege; alias verba significavent obligationem ad actum, sine animo obligandi ad actum; quod de illis non rectè dicitur. Unde etiam, cùm dicitur: in dubio obligationis, & poenarum, mitiorem interpretationem esse faciendam, admitto datam regulam, sed nego, quod, quando legislator utitur verbis præceptivis de ipso actu immediate, adsit dubium obligationis; nam supra quod immediate cadit præceptum, supra id im-

mediate cadit obligatio, ut constat ex confirmatione in n. 259.

270. Quæstio est secundò, an sit sufficiens indicium, quòd legislator intendat obligare in conscientia non tantum ad pœnam, sed etiam ad ipsum actum immediate à lege ordinatum, quando non utitur verbis præceptum significantibus, *de ipso actu, sed indifferentibus?* Resp. negativè, & dico, tali casu esse obligationem conscientiae *ad solam pœnam*, atque adeò legem esse merè pœnalem. Ratio est, quia, cùm legislator potuerit significare, quòd intendat obligare in conscientia etiam *ad ipsum actum* immediate ordinatum à lege, & tamen non fecerit, justè presumitur contra illum, quòd noluerit obligare in conscientia ad actum, sed solum ad pœnam transgressoribus statutam; hoc tamen intellige, *seclusa consuetudine mentem ejus aliter declarante;* sic Azor p. 1. l. 5. c. 6. q. 5. Sanchez l. 6. in decal. c. 4. Suarez de legib. l. 5. c. 4. n. 9. & alij. Ex quo infert Castropal. cit. p. is. n. 10. Si lex dicat: *ordinamus*, ne aliquis è regno pecunias, vestes, vel arma extrahat, *sub illorum amissione*; talem extractionem non prohiberi præcepto, vel lege rigorosâ (nimirum prohibente *illam extractionem* sub obligatione conscientiae) sed tantum transgredores subjiciente pœnis, nimirum illorum amissioni, *taliter*, quòd vi, & armis eorum exactioni, & acceptioni resistere non possint.

271. Quæstio communiter etiam est hoc loco, an vestigalia iusta debeantur in conscientia, si lex pœnam imponat non solventibus? negativam sequitur Navarrus in Summa, c. 23. n. 60. Angelus V. Pedagium n. 6. & omnes, qui tenent indefinitè legem humanam, quæ transgradientibus statuit pœnam temporalem, non obligare in conscientia, nisi ad solam pœnam, de quibus sermo fuit à n. 257. Castropal. tamen p. 1. tr. 3. d. 1. p. 15. n. 13. Q. Ex hoc, sequitur affirmativam non tantum, quando verbis præceptivis immediate directis ad solutionem vestigialium lex fertur (quia præceptum est de re iusta, & debita Regi) sed etiam quando per verba indifferencia, non quidem in vi legis humanæ, sed in vi legis naturalis, determinatae per illam ordinationem, & decretum Principis. Nam jure naturali tenentur subditi

ad Principis sustentationem concurrere; quo autem modo debeant concurrere, assignat Princeps suo decreto, ergo tali assignatione facta debentur illi vestigalia; sic ille.

In data quæstione judico valde probabiliter sustineri eam sententiam, quæ in conscientia obligat ad solutionem vestigialium, quæ iusta sunt, quando Princeps legem fert verbis præceptivis immediate directis ad eorum solutionem; non autem quando verbis solum indifferentibus, hoc est, non præceptivis immediate directis ad eorum solutionem. Ratio primæ partis est ex n. 264. ratio secundæ est ex n. 270.

quia etsi jus naturæ obliget subditos, ut concurrent ad sustentationem Principis modo, quo ipse ordinaverit; quia tamen potest hoc ipsum ordinare dupliciter. 1. ut sine ulteriori culpa conscientia in omissione solutionis, subeant pœnam confiscationis, ubi non solverint; atque adeo obligando in conscientia solum ad pœnam, non ad culparum; 2. obligandò in conscientia ad utrumque, ex lege naturali neutrum determinatè concluditur; sed solum alterutrum, prout scilicet ipse voluerit, tanquam expediens communib; bono; ubi autem utitur verbis solum indifferentibus, rectè arguitur, non voluisse obligare in conscientia, & sub peccato ad utrumque, ut diximus n. 270. & tenet ipse Castropal. cit. num. 10. ergo. Cujus ulterior ratio est; quia cateroquin etiam in eo casu, quo ipse Castropalaus (ut constat ex n. 270.) concedit esse obligationem solum ad pœnam, dici deberet, & pœnam, & omissionem extractionis mercium, esse debitam sub obligatione conscientiae, non quidem in vi legis illius humanæ, sed naturalis determinatae per illam humanam. Nam jure naturali tenentur subditi Reipublicæ concurrere ad huius conservationem; quo autem modo debeant ad hoc concurrere, assignat is, qui reipublicæ præfet; ergo tali lege posita in conscientia debetur reipublicæ non tantum pœna, si lex violetur, sed etiam non extractione v.g. armorum vetita sub tali lege; sed hoc non rectè sequitur juxta dictum authorem in n.

270. quando lex utitur verbis solum indifferentibus; ergo nec illud.

e. VI.

De verbis experimentibus naturam legis.

273. IN hac materia magnus omnino fons est dubitationum. Nam etsi frequenter constet de verbis legem experimentibus; plura tamen in dubitationem veniunt, i. an verba sint *præceptiva*, aut *verantia*; an solùm *hortativa*, *consiliativa*, an importent obligationem conscientiæ ad ipsum actum à lege immediate ordinatum, an ad solam pœnam? &c. item esto sint *præcipientia*, vel prohibentia, an eo ipso obligent sub culpa gravi, ex hoc præcisè, quod verba sint graviter prohibentia? vel quod sint de materia secundum se gravi? vel imponant transgressoribus pœnam gravem &c. Pro resolut.

274. Not. 1. ex dictis n. 234. certum esse, quod legislator tam civilis, quam Ecclesiasticus, obligare possit in conscientia suos subditos; quia obedientiæ præceptum, vel potius obligatio obediendi, est non tantum juris humani, sed divini. Nam ad Roman. 13. v. 2. dicitur: *qui resistit potestati, DEI ordinationi resistit; qui autem resistunt, ipsi sibi damnationem acquirunt.* Item 1. Reg. 3. *Non te abjecerunt, sed me.* Ex quo clare sequitur omnes leges humanas obligare in conscientia; quia ipsarum transgressio non est tantum offensa respectu Principis hominis, sive legislatoris humani: sed etiam DEI, adeoque necessariò ledit transgressoris conscientiam; ita communis cum S Thoma I. 2. q. 96. a. 4.

275. Not. 2. in dubio, utrum verba legislatoris sint *consilium*, an *lex?* reputanda consilium; ita Sanchez l. 6. in decal. c. 4. n. 26. & 62. similiter, quando de veniali obligatione possunt intelligi, non debere ad mortalem extendi, juxta Sanchez loc. cit. ex vulgato axiomate, quod in dubio pro subditis sit *judicandum*, ne scilicet graventur certò, ubi dubium est de lege positum.

Not. 3. verba, quæ ex communione Doctorum consensu legem affirmativam significant, esse sequentia: *præcipio, jubeo, impero, mando:* Quæ verò negativam, regulariter hæc: *prohibeo, inhibeo, veto, interdico;* ita Sanchez cit. n. 3. sed Sà V. *lex*, quem sequitur Azor in præsenti, putat verba *jubeo* vel *mando*, non importa-

re gravitatem præcepti. Alia superioribus æqualia sunt, *teneantur omnes, obligentur omnes, nemini liceat,* & generaliter omnia, quæ necessitatem important: Sanchez cit. n. 38. Verum in his ipsis multi doctorum variant; quare

Not. 4. quod, etsi verbum, *debet*, juxta communiorum importet necessitatem, seu præceptum; quandoque tamen solùm debitum honestatis, & decentiæ. Prima pars probatur pluribus juris utriusque textibus à Barbosa, de dictio. usu frequent. dict. 77. à n. 1. & constat ex c. *Proposuit*, 24. §. *Super quo*. de appellat. ubi dicitur, quod judex, à quo appellatur (quia appellanti omnino suspectus est) *non debet* cum ad respondendum super alijs compellere. Idem habetur in c. *oblatae*, 57. Q. *Superior quo*, ibi: potest, *imo debet* Superior Judex, ad quem fuerat appellatum, terminum providè moderari, ne gregi Dominico diu desit cura Pastoris.

Secunda pars etiam probatur. Nam 1. ubi verbum *debet* dirigitur ad personam, cuius favore profertur, non significat necessitatem, vel præceptum; sed tantum debitum honestatis, & decentiæ; cum enim possit renuntiare favori sibi concessu, eo ipso non est debitum præcepti, ut colligitur ex L. *Cum Pater*, 79. Q. *mando*. ff. de Legat. 2. junct. Glos. V. *Juri*. Secundo, quando subjecta materia repugnat, non importat necessitatem, seu præceptum, sed debitum solius decentiæ, ut diximus l. 4. tit. 1. quod verum est, quamvis addatur dictio *omnino*; ubi enim materia, in quam præceptum cadere deberet, præcepto repugnat, eo ipso legislator nolle præcipere meritò præsumitur; ita Sanchez l. 4. de matr. D. 23. n. 2. Abbas, Felinus, & alij apud Barbos. cit. n. 6. Et hoc etiam verum est in casu, quo si significaret præceptum, resultaret absurdum, vel alicuius juris correctio, juxta L. *Pretor*, ff. de edendo. Imola in Clementin: *Attendentes, de statu Monach.* n. 7. & alij

Tertiò: quando verbum *debet* jungitur particula, quæ importat consilium (ut cum dicitur: *humiliter debet*) non necessitatem, sed decentiæ debitum importat; quia tunc à proprietate sua significacionis per adjunctum terminum distrahitur. ita Sanchez l. 6. *summæ c. 4. d. n. 36. Glos.*

in t. 1. dist. 6. V. humiliter. Similiter particula non licet non significat semper prohibitionem gravem, esto assumatur à Concilio generali; sic in Concilio Altisiodorensi can. 15. dicitur: non licet mortuum supra mortuum mittere; & can. 18. non licet presbytero in Ecclesia stare, dum Misse dicuntur; & tamen non est graviter prohibitum. Quintanad. singul. tr. 2. singul. ult. n. 3. Unde idem tenet (quando ly non potest invenitur in jure, vel Pontificali) non induci propterea nullitatem actus. Nam, cum dicitur, non potest quis iustificari, nisi prius fuerit peccatum confessus, non significatur nullitas; cum possit per contritionem. Aliquando autem idem est, ac, non decet, non expedit, non oportet &c. Quintanad. tr. 2. singul. 7. n. 4. ubi docet validè patrinum agere in confirmatione, qui confirmatus non est.

279. Verbum oportet, variè etiam sumitur. Nam interdum excludit judicij arbitrium, ut habetur *L. Verbum oportere* 37. ff. de Verb. Signif. Interdum accipitur pro consentaneo, & opportuno, ut testatur *Rebuff. V. Idem dicerem*, apud *Pereyram* in *Elucidario de legibus* l. 1. elucid. 9. n. 223. quandoque importat necessitatem, seu præceptum, teste *Valentiâ* 1. 2. D. 7. q. 7. p. 6. quæstiunc. 2, quandoque solam decentiam, ut tenet *Salon.* 2. 2. q. 77. a. 1. cant. 8.

280. Verbum admoneo non inducit mandatum per *L. Idem* q. si quis ea, que. ff. mandati. Verbum moneo solum importat concilium, *Vasq.* 1. 2. q. 96. a. 4. D. 158. c. 3. Si autem dicatur: moneas, & inducas, non indicari præcisam coactionem, nec per hoc dari potestate compellendi, vult *Pereyra* cit. n. 223. Subjungens verbum statuimus esse novi juris inducivum, juxta c. statuimus de offic. delegat. in 6. interdum autem significare rem perfectam, & habere vim sententiae definitivæ juxta *Gloss. V. statuimus*, in c. Cum ab uno, de sent. & re judicat. in 6.

281. De verbis imperativi modi dubium est, an absolute prolatæ præceptum continent? Sunt autem hujusmodi: facite, cave-te, solvite, abstineant omnes, nemo andear. *Emman. Sà V. Lex.* n. 6. docet, ea solum importare obligationem sub veniali: *Sanchez* cit. in *decal. l. 6. c. 4. n. 39.* judicat in similibus standum regionis con-

suetudini; quod si neque de ea constet, docet recurrentum ad materiae gravitatem, & necessitatem; quæ, si existimetur à legislatore ponderata, censenda erunt verba graviter præceptiva. Et hoc est probabilius; quia in decretis Concilij; & Pontificum, uti habetur in *Clement.* Exivi, de verb. signif. Q. Item ex hujusmodi verbis cum materiae gravitate conjunctis bene colligitur gravitas præcepti, argumen-to ducto à legibus canonicas ad civiles; ita *Castropal. tom. 1. tr. 3. d. 3. p. 9.* de legibus.

Dices: Alexander VII. die 18. Martij, 281. 1665. ut scandalosam damnavit opinionem afferentem: verba Concilij *Trid. sess. 13. c. 7.* quam primum confiteatur, non esse præceptum. Hinc P. Matthæus de Moya in qq. select. *Theolog. moral. tr. 6. d. 4. q. 3. Q. 5. n. 33.* opinioni, principio, prioris numeri traditæ, non audet ad hærente. Verum hæc non adversantur doctrinæ de verbis imperativi modi traditæ. Nam ratio præcepti non eruitur in præsenti casu ex solo verbo *confiteatur*, quod est imperativi modi; sed ex materia substra-ta, quæ in sumptuoso sacram Eucharistiam de necessitate requirit animum non conscient peccati gravis, consequenter exigit ejus delectionem per Sacramentum pœnitentiae, quod est medium (quoad nos) securius, & communius ad statum gratiae.

Inter verba, quæ sui naturâ, nec præceptum important, nec præcepto æquipollent, numerat *Sanchez l. 6. decal. c. 4. n. 40.* & *Pereyra* cit. n. 224. sequentia: monemus, hortamur, intendimus, ordinamus, statuimus, constitui-mus, innovamus, volumus, decernimus, Sancimus. Et per hæc, ait *Pereyra*, si ponantur, quin aliunde materiae gravitas, vel superioris intentio appareat, nullius culpæ obligati-onem imponi; cuius ratio est; quia dum non constat subdito, actum à legitimo superiore suo esse præceptum, vel vetitum sub obligatione conscientia; omissione, vel positione talis actus non violat subjectionem suo superiori debitam; sed in da-to casu nec ex verbis, ut ponit casus, nec ex materiae gravitate, nec aliunde constat superioris intentio; ergo.

Ex his tandem concluditur, cum tota 284. yis humanæ legis, saltem radicaliter, pen-

pendeat à voluntate legislatoris, qua posita jus naturale subditos stringit ad ei parendum rectè quidem colligi, superiorem velle obstringere in conscientia, quando utitur *verbis præceptum importantibus*, vel ex natura sua, vel ex recepto jam usu in tali Provincia: non tamen rectè concludi universaliter ex solis illis verbis præceptivis, eam obligationem, vel esse gravem, ut constabit ex dicend. in seq. vel esse determinatè de actu, per legem immediatè ordinato, seu prescripto. Nam quando præcipitur, vel prohibetur aliquis certus actus, vel simul imponitur transgressoribus pœna legalis, vel non? si non? actus immediatè ordinatus à lege cadit sub obligationem conscientiae in casu, quo lex utitur verbis præceptivis, tunc enim ratio præcepti externe significata, in aliud cadere non potest, expressum à lege. Sin autem simul imponit pœnam Spiritualem, quæ necessariò supponit culpam conscientiae; saltem indirectè, actus immediatè ordinatus à lege, cadit sub obligationem conscientiae; cum pœna, quæ tunc directè imponitur, statui non possit in dato casu, nisi propter culpam contra conscientiam, ut ponit casus: si denique pœnam solum temporalem? & non utatur verbis præceptivis, directis ad actum immediatè ordinatum à lege, tunc obligationem conscientiae, significatam verbis præceptivis simul, & penalibus, non esse determinatè de ipso actu immediatè ordinato à lege, sed duntaxat de pœna, constat ex dictis; ergo ex hoc, quod lex utatur verbis præceptivis, non rectè infertur universaliter obligatio conscientiae de actu immediatè ordinato à lege

285. Concluditur 2. quod, licet superior aliquid ordinet, & utatur verbis vel formaliter, vel æquivalenter præceptivis, etiam directis ad actum immediatè prescriptum per eam superioris ordinationem, non semper sequatur, cum actum esse sub obligatione conscientiae sic, ut transgressio sit peccatum, si scilicet aliunde constet, superiorem non intendere subditis velle imponere obligationem conscientiae, uti contingit in multis Religionibus, quarum leges, & regulæ (quantum est ex ipsis) non obligant sub peccato etiam veniali.

286. Concluditur 3. quandoque fieri, quod superiores utentes verbis communibus (ni-

mirum nec formaliter, nec æquivalenter præceptivis) addant alia pariter non præceptiva, quæ tamen ex communi, & recepto jam usu, superioris voluntatem præceptivam sufficienter indicant; atque adeò quoties Superior sic mentem suam declarat, intelligendum, verè præcipere. Unde si dicat legislator: ordinamus in virtute obedientie, in virtute Spiritus sancti, sub intermissione pœnae aeternæ, sub comminatione indignationis SS. Apostolorum Petri, & Pauli, semper centendum esse verè præcipere.

Concluditur 4. posse ex statutis particularibus communitatum particularium usurpari verba rigorosè præceptiva, nec tamen continere rigorosum præceptum. Unde si quis diceret in Societate JESU præcipio, impero, mando: & non adjungeret, in nomine JESU, in virtute Spiritus sancti, vel in virtute S. obedientie, non censetur graviter præcipere. Si tamen relictis prioribus diceretur: mando sub excommunicatione, vel sub intermissione pœnae aeternæ; putat Thomas Sanch. cit. in decal. fore grave, & rigorosum præceptum. Hanc exceptionem, quam facit Societas, fecerunt antecedenter plures aliae Religiones. Unde præter illa, quæ sunt juris communis, recurrendum in similibus ad municipalia, quæ si defuerint, standum est in jure communi.

Concluditur 5. omnino credendum, 288. verbum præcipio, seu præceptum usurpatum in jure canonico, vel civili, semper importare aliquam obligationem conscientiae, nisi ejus significatio ex aliquo adjuncto minuatur. Plures hujus rei probationes affert Cardenas in Crise Theol. tr. 3. de legibus D. 24. à n. 5. sufficiat ea, quæ suggerit Clementina Exivi de verb. signific. Nam cum Clemens fuisse consultus, quæ regulæ Franciscanæ obligarent graviter, quæ non? respondit, quod, quæ significantur voce præcepti, aut æquivalenti, importent obligationem gravem, nimirum supposita gravitate materiae. Sic enim textus ait: aperte discrevit, quod quod ad quædam ipsorum ex vi verbi transgressio est mortalis, & quod quædam alia, non; cum quod quædam ipsorum verbum apponat præcepti, vel æquipollentis eidem; & quod aliqua verbis alijs sit contentus, nimirum Legislator. Unde sic arguitur;

quando legislator utitur verbo *præceptum*, vel *ei æquipollente*, ex vi illius verbis, significatur obligatio conscientiae, & quidem gravis attenta materiae gravitate, ut declaravit Pontifex in *Clement.* *Ex ijs;* ergo verbum *præcipio*, seu *præceptum*, ex vi *nativæ significationis sua*, quam habet ex communi jam, ac naturali uso suo, in jure importat *aliquam obligationem conscientiae*, nisi ex aliquo adjuncto illius significatio minuatur.

289. Dixi 1. *Ex vi nativæ significationis sua*, quam nimur habet ex institutione sua, communiter jam recepta; licet accidentaliter in communitatibus privatis ex declarata legislatorum voluntate ejusmodi verbū sumatur infra significationem suam nativā pro obligatione, seu debito solius decentiae, ac honestatis, nimur absque obligatione peccati, ut diximus n. 285. Dixi 2. quod verbum *præcipio*, seu *præceptum*, quo legislator utitur, semper importet *aliquam obligationem conscientiae*. Nam eti Cardenas cit. velit hoc universaliter intelligi, ut, quoties legislator utitur eo verbo, significetur obligatio conscientiae, & non solum obligatio *pænalis*, consequenter etiam *moralis* ad ipsum actum sub lege positum; hoc tamen universaliter admitti non potest. Nam iu casu, quo apponit pœnam transgressoribus temporalem, & utitur verbis *præceptivis* (si hæc non dirigantur ad actū immediate præscriptum à lege) important solum obligationem conscientiae ad pœnā juxta dicta sup. non autem ad actum immediate possum sub lege, ut diximus loco cit. Dixi 3. nisi ex aliquo adjuncto minatur eius significatio. Certum enim est, terminos ex adjuncto aliquo Syncategoremate, vel alio termino, ex materia substrata, vel ipso etiam contextu, vel clausulis appositis, à propria quandoque significazione distrahi, ampliari, alienari, ut constat ex his, *homo moritur, justus peccat*, &c.

290. De verbo *statuo* extat etiam speciale capitulum, quo Clemens III. c. *In ijs. 15. de verb. signific.* in casu, ubi dubitatum fuit: an verbum *statuo*, vim sententiae inter partes habeat? dubitationem resolvit. Cùm enim in quadam controversia inter partes A & B definienda, Archiepiscopus Mediolanensis post causæ cognitionem, in prolatione sententiae, non suis let usus his verbis: *talem partem condemnō, vel talem partem ab-*

solvō; sed ita pronuntiasset: *ita statuo, & præcipio*, dubitatum fuit: an ea sententia esset firma? cùm verbum *statuo* non videatur habere vim sententiae?

Rescripsit Pontifex Clemens III. ut vult Gonzalez; aut Celestinus III. ut notat Wagnereck ad dictum c. *In his*, vel, ut alter vult, *In ijs*, hæc formā: *Nos attentes*, quod hoc verbum *statuo*, secundum legem, rem perfectam significat, & cum effectu, non verbotenus accipitur (nimur in eo casu) itē secundum Gregorium, quod præcipitur, & imperatur; & quod imperatur, necesse est fieri; & aliquando si non fiat, pœnam habet: considerantes nihilominus, quod juxta eundem Gregorium, non debet aliquis verba considerare, sed voluntatem, & intentionem; quia intentio non debet verbis deservire, sed verba intentioni: interpretamur in præsenti articulo, & definimus, quod prefati Archiepiscopi verba, tali formā prolatā, perpetuā valitute sententie obtineant firmitatem.

Ex quo textu colligitur 1. quod sententia definitiva debeat continere abolitionem, vel condemnationem, ut dicitur 2. q. 6. c. *Ei, qui; L. omnium Judicium*, c. *de sent.* & *interloc.* hanc autem sufficienter contineri, si exprimatur per verba æquipollentia, ut in textu *cit.* per verba: *statuo*, & *præcipio*; de quo plura Gonzalez in *cit. c. 15. de Verb. signific.* n. 2. Colligitur 2. an verbum *statuo* importat *præceptum*, an non? non tam definiendum nudo ipsius verbi, aut vocis spectato cortice; sed potius spectata intentione loquentis, cùm huic verba deservire debeant, non econtra; quod maximè etiam obtinetur, si consideretur materia substrata cum suis circumstantijs, ut casus explicat in hoc textu; & hoc in materia legum præcipuum est, ut stetur intentioni ferentis legem.

§. VII.

An, cùm verba legis sunt graviter præceptiva, rectè colligatur obligatio gravis.

292. Questio est 1. an verba mentem legislatoris indicantia, si sint graviter præceptiva, sola sufficient ad inducendam, vel cognoscendam gravem obligationem?

tionem? Verba graviter præceptiva sunt: *in virtute Spiritus Sancti, in virtute obedientiae, in virtute juramenti, vel voti facti; sub pena praefiti juramenti, in nomine seu virtute JESU, sub intermissione gehenna, sub pena maledictionis aeternae, sub pena indignationis, vel maledictionis DEI, sub obtestatione divini judicij &c.* His nonnulli addunt verba præceptiva sub gravi, pena non tantum spirituali, sed etiam temporali v. g. *moris, mutilationis, perpetui exilij &c.*

^{293.} In hac quæstione videtur *ex solis verbis graviter præcipientibus* nec induci, nec cognosci gravem obligationem, seclusa gravitate materiae. Nam graviter præcipere aliquid, non graviter necessarium ad finem, quem respicit potestas legislativa, est iniquum, & irrationabile, ac extra limites potestatis legislativæ; quia foret non in ædificationem, sed destructionem, & ruinam. Hinc rectè ait Gibalin. de sacr. jurisdiction. *disquis. 2. q. 2. n. 6.* *quamvis superior milles prohibeat leve mendacium, aut verbum otiosum, etiam in virtute sanctæ obedientiae, non idcirco, qui leviter mentitur, aut verbum otiosum profert, peccabit mortaliter.*

^{294.} Gravitas porrò rei præceptæ non debet sumi *ex re* præcepta secundum se, sed *ex fine*, quem comparare intendit præcipiens; sic Gibalin. *cit. Q. 5.* Finis autem, qui medio ex se indifferenti, aut admodum levi, gravitatem asperre potest, ille est, qui bonum commune primariò, & per se spectat; bonum autem privatorum, non nisi secundariò. Duæ etiam circumstantiæ juxta Suar. D. 18. *de censur. f. 3. n. 18.* gravitatem addere possunt, *scandalum, & periculum peccati mortalis* in quo hominem constituunt; sed intellige periculum proximum.

^{295.} Ex dictis colliges, solā legislatoris voluntate, ex verbis legem exprimentibus agnita, non posse esse gravis obligationis sufficiens indicium; pater ex defectu potestatis rē levem graviter præcipiendi, quam juxta magis communem non habent legislatores humani, fortè nec habere possunt, propter materiae incapacitatem; Sanch. *in decal. l. 1. c. 4. n. 4.* consequenter ad dignoscendam gravem obligationem utrumque necessariò requiri: *gravitatem materie, & legislatoris voluntatem agni-*

tam, quæ licet non possit materiam levem graviter præcipere; potest tamen gravem leviter. Not. tamen, quod si contra clara verba, gravem obligationem exprimentia, velis ferre judicium prudens, & practicum de levi obligatione, debeat tibi de levitate materiae evidenter constare; quia in dubio non est spoliandus superior suâ possessione; Sanch. loc. cit. n. 3. in fine, & ex illo P. Henricus Herdinck in M. S. de legib. supra cit.

Quæstio est 2. an, quoties adest gravitas materiae, & legislatoris præcipientis voluntas agnita, toties adsit sufficiens iudicium gravis obligationis ad actum immediatè positum sub lege? Negativam complures sequuntur. Docent enim nullas leges tam civiles, quam Ecclesiasticas, penam temporalem imponentes, obligare sub mortali, nisi id expresserit legislator, ut notavimus à n. 257. ubi retulimus hujus sententiæ defensores; quibus positis.

Cum per ea, quæ præmisimus, constet, ^{297.} *ex solis verbis graviter præceptivis, non rectè argui gravem obligationem ad actum immediatè positum sub lege: nec ex sola gravitate pena temporalis statuat transgressoribus, nec etiam ex gravitate pena temporalis, & verbis graviter præceptivis, si haec non dirigantur ad actum immediatè præscriptum à lege: quoties legislator in materia gravi utitur verbis graviter præceptivis, immediatè directis ad actum sub lege positum, etiamsi statuat transgressoribus penam solum temporalem, esse sufficiens signum gravis obligationis non tantum ad penam, sed ipsum etiam actum; secùs, si verba, licet sint præceptiva, non dirigantur ad actum immediatè positum sub lege. Ratio primæ partis est; quia tunc adest præceptum directè circa actum, ut ponit casus; præceptum autem propriè importat obligationē conscientiæ ex n. 288. ergo tunc adest obligatio conscientiæ directè circa actum; sed quando materia directè præcepta est gravis, & graviter præcipitur, est obligatio gravis; ergo cum utrumque concurrat in dato casu, etiamsi transgressoribus statuat penam temporalem, obligatio conscientiæ erit gravis non tantum ad penam, sed etiam ad actum directè positum sub lege. Ratio secundæ partis est; quia si verba præceptiva non diriguntur ad actum, non est, quod exten-*

ternè significet in legislatore intentionem obligandi conscientiam *ad actum*; ut dictum est n. 270.

§. VIII.

De obligatione non apponendi, vel removendi obicem implenda legis.

298. **Q**uestio est, an quis peccet, dum apponit obicem, seu impedimentum, vel illud non removet vel, si prævidet, constante se non valitrum implere legem, quam alias deberet? Peccari quandoque in tali casu, certum videtur. Nam ex communi doctorum sensu, peccat obligatus ad horas canonicas, si breviarium, quod habet, libere, ac sine omni causa justa comburat, prævidens, se cras non habiturum aliud, consequenter non valitrum persolvere pensum horarum cæteroquin debitum: non tamen peccari *semper*, etiam certum videtur; nam excommunicatus non peccat, non procurando absolutionem ab ea censura, esto prævideat, se non valitrum audire sacrum eo die, quo alias eam remotam deberet; nec opifex tenetur abstinere à labore sibi conveniente, licet prævideat, se illo stante non valitrum satisfacere præcepto jejunij. Ex hoc sequitur non posse admitti hanc doctrinam, quæ *indefinitè*, ac *universaliter* docet peccari, *quoties* *impedimentum* *apponitur executioni præceptæ*, *vel* *impedimentum* *jam appositorum non tollitur*, *vel* *apponendum non removetur*. Nam hoc fallit in multis casibus, ut colligi potest in exemplis jam allatis.

299. Dices: superior præcipiens finem, simul præcipit media necessaria; sed inter media necessaria est non apponere, vel jam appositorum impedimentum executioni præceptæ removere; ergo, qui hoc non facit, peccat. Sed hoc argumentum à Theologis non admittitur. Nam fallit in multis, scilicet distinctione. Deus enim efficaciter vult, & præcipit pœnitentiam de peccato, quin velit, aut præcipiat præviam existentiam peccati, licet sit medium unicè necessarium ad pœnitentiam, deletivam peccati; idem est de pena damnatorum, quæ non stat sine impenitentia finali; & tamen illam DEUS efficaciter vult, quin velit efficaciter istam. Hinc dicunt, quando quis efficaciter intendit finem, non requiri, quod e-

tiam efficaciter velit medium unicè necessarium, quando prævidet aliunde futurum sub conditione, quam habet in sua potestate, ac purificat intendendō finem. Sed his prætermisssis.

Resp. ad argumentū dist. maj. Superior præcipiens finem, simul præcipit media, ea voluntate, qua vult finem, transī. secū neg. ma. hinc transeat, quod, ubi finem præcipit absolute ac simpliciter, etiam absolute ac simpliciter præcipiat media; hoc tamen negatur, ubi finem præcipit solum sub conditione, seu ex suppositione, quod subditus sit expeditus, seu non justè impeditus in talibus circumstantijs ad ponendum finem. Nam ubi est justa ratio non ponendi, vel non removendi certam circumstantiam, non præcipit non positionem, vel remotionem talis circumstantiæ; sic, ubi necessitas infirmi exigit præsentiam Petri quæ stante hic die festo nequit adesse sacro, præcipiens auditionem sacri, Petrum non obligat ad subtrahendam infirmo suam præsentiam.

Difficultas est, quæ leges, vel præcepta per se loquendō, simpliciter, & absolute præcipiant finem, consequenter appositionem medijs unicè necessarij, & remotionem impedimenti incompossibilis cum executione legis vel præcepti? Resp. talia esse præcepta, seu legem naturalem; sic Castropal. p. 1. tr. 3. D. 1. p. 21. n. 2. Nam obligatio, quam importat jus naturale, nascitur ex ipsis rebus ex se, & antecedenter ad omne jus positivum, consonis, & dissonis naturæ rationali, quæ tali, ac primæ regulæ omnis honesti: ergo non potest esse limitata ad hoc, vel illud mediū ponendum; aut hoc, vel illud impedimentum removendū; sed necessariò extendit se ad omne medium unicè necessarium; & quodvis impedimentum incompossibile cum executione finis præcepti: quamvis non immerito dici possit, etiam jus naturale non accipendum de aetū, vel omissione aetū sub quacunque circumstantia; cum saepè contingat, in certis circumstantijs licere, quod in alijs jure naturali non licet: secū autem dicendum est in jure, seu legibus, & præceptis positivis; nam hæc non obligant cum tanto rigore: sic quia *mentiri*, & *odisse* D E U M, jure naturali vetitum est, nec vita periculum excusat ab obligatione *non mentiri*.

endi,

endi, vel non odio habendi D E U M secluso errore; secùs tamen est in præcepto positivo audiendi sacram, jejunandi; nemo enim die festo tenetur audire sacram; aut die jejunij abstinere a cœli carnium, si per hoc subiret vitæ periculum, prudenter existimatum, inde na-

sciturum. impletionem præcepti, aut legis urgentis, prohibitum est; puta, si die, quo audendum foret sacram, te committeres ludo, somno, aut alteri actioni non necessariæ, cum sacra auditione incompossibili, prævidens futurum, ut inde sacri auditio impediatur; secùs dicendum est, ubi præceptum nec actu urget, nec in proximo est, ut urgeat; ita Castropal. cit. n. 3. dixi, cum Sanchez, Salas, & alijs. Nam in hoc casu ista impedimenta non sunt, nisi remota.

Quæstio tamen ulterior est, quæ sint illa media, ad quæ ponenda; vel impedimenta, ad quæ removenda obligant, vel non obligant leges, aut præcepta positiva?

Resp. Sanch. l. 1. in decal. c. 15. n. 4. & Salas 1.2.q.71 tr. 13.d.2 f.9. à n. 117. hanc obligationem desumendam esse ex modo, quo quodlibet præceptum receptū est. Hanc responsionem ex parte approbat Castropal. cit. n. 3. dicens: in præceptis, & legibus positivis, eorum mediiorum appositionē esse sub obligatione, quæ per se, & natura sua necessaria sunt ad illorum executionem, ac eorum impedimentorum omissionem, vel remotionem, quæ per se, ac naturā suā obstant illarum executioni. Quoad reliqua vero servandum id, quod fert consuetudo, & modus, quo ejusmodi leges, & præcepta in usum deductā sunt.

In prima parte hujus regulæ omnino judio, eam rectè procedere quoad media per se necessaria; vel impedimenta per se obstantia, quando ea apponi, hæc omitti possunt, ubi non suffragatur causa sufficienter excusans ab earum positione, & istorum remotione; consequenter in casu, quo moraliter (spectato nimurum iudicio prudenti, ac peritorum in materia, de qua ponenda, vel removenda queritur) possibilia sunt subdito. Sic surgere de lecto, adire templum, tempore, quo erit sacram ex obligatione audiendum, est medium per se necessarium, consequenter per se præceptum lege audiendi sacram, quoties abest causa excusans in ijs circumstantijs, a positione illorum mediiorum, vel appositione impedimentorum, quibus stantibus ex natura rei actus præceptus executioni dari non potest. id ipsum tamen limitari debet ad omissionem medij, vel appositionem impedimenti, quo fit, ne præceptum executioni possit dari, quando contingit, vel jam urgente præcepto, vel saltem cum est in proximo, ut urgeat. Nam eo casu apponere impedimentum naturā suā impediens executionem, sou

Quoad alteram partem de appositione, vel non remotione impedimentorum, quæ quis apponit, sciens impeditum iri finem, ac executionem præcepti, auctu, vel in proximo urgentis, non est illicitum ea apponere, vel removere, quæ jam est recepta consuetudine, vel modō, quo certæ leges receptæ sunt, pro apponibilibus, licet habentur, licet alioquin necessaria non sint; quia Legislator tali casu non imponit præceptum cum extensione ad finem v. g. jejunij in ejusmodi circumstantijs. Ex communī enim Doctorum consensu agricolæ, fabri lignarij, vel ferrarij, & alij, toto die graviter labore corporali desudantes, non obligantur ad abstinentiam ab ejusmodi labore (licet divites sint, nec tali die illo labore ad alimenta familiæ, aliave doniūs suæ onera indigeant) quamvis prævident, se titulo fatigationis ad conservandas, vel restaurandas vites, non valituros implere legem jejunij. Dixi: si talis actio, vel exercitium corporis, aut etiam animæ (v. g. studium in docendis, vel addiscendis literis, concionando &c.) in numero eorum exercitorum sit, ad quorum circumstantiam leges se non extendunt; quod tandem reducitur ad eam regulam, jus positivum, sive prohibens, sive præcipiens, non extendi ad casum in circumstantijs, in quibus adest iusta causa, subditum eximens ab observantia legis; ut cum sunt tales circumstantiae, quibus stantibus prudenter, ac merito præsumi potest, legislatorem à subdito in præsenti statu, & talibus circumstantijs constituto, non exigere positionem, vel omissionem actus, illis seclusis cæteroquin ex obligatione ponendi, vel omittendi. Talis tamen censi non debet, appositi impedimenti, quæ fit in fraudem legis, nimurum de industria, & animo cludendi.

Tom. I.

K

di

di vim legis; cùm nemini fraus sua patrocinari debeat. Casus videtur esse, si quis præcisè, ne teneatur ad abstinentiam à secunda refectione in quadragesima v. g. susciperet exercitium aliquod corporale, tantæ quandoque fatigationis, quantam subeunt mechanici prosequentes operas suas; si id fieret, secluso omni alio honesto fine, comparatione cuius illud exercitium haberet rationem medijs.

ARTICULUS VIII.

De Actibus legis.

305. **Q**uartuor actus legi proprios communiter numerant Authores, juxta L. legis virtus: ff. de legibus, ubi Modestinus ait: *Virtus hec est, imperare: vetare, permittere, punire.* Ex hoc inferunt Doctores cum D. Thoma 1. 2. q. 92. a. 1. nullam esse legem, quæ saltem aliquo modo, & ratione vel non imperet, vel non vetet, seu prohibeat, vel non permittat aliquid faciendum, vel factum non puniat; Sic A-zor p. 1. l. 5. c. 5. q. 5. Suarez de leg. l. 1. a. c. 15. quos citat, & sequitur Castropalaus p. 4. n. 1.

306. Loquendô autem de lege imperante & vetante not. 1. licet imperans actum aliquem præstandum, eo ipso etiam, saltem indirectè prohibeat omne aliud in-compossibile cum existentia actus, per imperium intenti; adhuc tamen imperare, ac vetare, seu prohibere, inter se differe 1. quia lex imperans (quam alij etiam vocant præceptum affirmativum, seu positivum, sumendò præceptum non strictè, prout diximus superius; sed latè pro lege generaliter) directè intendit positionem alicujus actus; & vetans, seu prohibens (quam alij vocant præceptum negativum) directè intendit omissionem actus. Præceptum enim positivum, seu affirmativum est, quod directè (nimurum ex fine, quem immediate respicit) præcipit positionem actus; negativum, quod directè intendit alicujus actus omissionem. Et ideo etiam leges alias sunt affirmativa, alias negativa: illæ præcipiunt actus humani exercitium, istæ prohibent. Harum tamen distinctio in praxi male colligitur ex vocabulis, quibus proferuntur: rectè ex objecto, in quod legislator directè fertur. Unde licet lex affirmativa etiam prohibeat, quid quid est in-

compossibile cum actu, quem intendit; consequenter ejus omissionem petat; id tamen solum exigit indirectè, quatenus directè querit positionem actus. Hinc licet in rigore quælibet lex, verè ac propriè aliquid imperet, nimurum positionem vel omissionem actus; hoc ipsum tamen imperium ex fine directè quæsito esse aliud affirmativum, quando intendit alicujus actus humani positivum exercitium; aliud negativum, si ejus omissionem, sive puram, sive positivam.

Ex hoc colliges: in quæstione, an lex aliqua, vel præceptum sit affirmativum, vel negativum? de qualitate judicium esse ferendum ex fine per legem, vel præceptum directè quæsto; non autem ex verbis, quibus voluntas, & dispositio legislatoris effertur, aut enuntiatur; sic, licet omnis actus intellectus sit intellectio, alia tamen est affirmativa; alia negativa. Hinc sequitur, istam legem, vel præceptum: v. g. die festo non omittes sacram (licet efficeretur verbis, seu propositione negativa) nihilominus esse affirmativum; quia finis ejus directè intentus, est positio alicujus actus, nimurum auditio sacri; & hoc (abstinebis à mendacio, blasphemia &c.) esse negativum; esto efficeretur propositione affirmante; quia finis ejus directè quæsus, est omissione mendacij, blasphemie &c.

Pro lege permittente, not. licet alicui aliquid permittere non inducat obligationem, quæ teneatur is, cui permittitur, inducere tamen obligationem in alios, ne facientem id, quod sibi permisum est, impediatur, vel propterea puniant. Hinc si, quod alicui permittitur, est bonum, prohibentur alij, ne ipsum in ejus usu impediatur; si vero sit malum, inhibentur Juges, ne, si faciat, propterea puniant. Ex hoc colliges: dispositionem superioris, qua subdito aliquid permittit, non esse legem, in quantum respicit eum, cui fit aliqua permissio; sed in quantum respicit alios, quos obstringit, ne in actu permissio alterum impediatur, aut (si malus, sed permissus est) propterea puniant; quod tamen intellige de illis, qui permittenti subditi sunt; alias enim eos lege suâ, alteri aliquid permittente, non posset obligare; cùm nulla detur jurisdiction in non subditum.

Advertendum præterea, esse discri-
men